

25 onns Pro Svizra Rumantscha

Stà fatg in pass decisiv vers La Quotidiana

■ **(anr/gc) Avant 25 onns è la Pro Svizra Rumantscha (PSR) vegnida fundada. Cun quella han ins fatg in pass decisiv – tenor sia finamira – da vegnir tar ina gasetta rumantscha dal di. Ella è stada 1996 confundatura da l'Agentura da novitads rumantscha, vegnida installada oriundamain per dar sustegn a las gasettas rumantschas regionalas.** In onn pli tard 1997 – pia avant 20 onns – è La Quotidiana cumparida per l'emprima giada. L'editura da LQ, la Somedia, vegn a festivar en curt il 20. anniversari da La Quotidiana, la suletta gasetta rumantscha dal di. Quest onn crodan pia dus giubileums: 25 onns PSR e 20 onns LQ. Sco quai che la PSR ha communitgà vegn ella a festivar ils 3 da mars 2017 ses giubileum da 25 onns cun ina «Debatta davart ideas per il futur dal rumantsch». Quai vegn a succeder en il rom da sia radunanza generala a Cuira.

Prestà blera lavur 2016

Dapi in onn vegn la PSR timunada dad in co-presidi: *Annetta Zini* e *Flurin Bundi*. La nova suprastanza ha salvà l'onn passà tschintg sesidas. Ella è s'occupada intensivamain cun la politica linguistica dal rumantsch. Era ha ella prendì part da la Dieta rumantscha, organisada da la LR, e da sia discussiun davart la restructuraziun da l'Uuniun tetgala rumantscha. La PSR

ha proponì a quella chaschun – cun buns arguments – che la LR stoppia l'emprim definir sia strategia a lunga vista avant che vulair sa reorganisar.

Impurtant è per la PSR da tgirar il contact cun uniuns e personas che s'engaschan a favur da la Rumantschia. Uschia è ella s'inscuntrada dacurt cun represchentsants da l'Uniun da Rumantschas e Rumantschs en la Bassa (URB) e cun la Giuventetgna rumantscha (GiuRu) ed ha era rinforzà ses contacts cun la Pro Grigioni Italiano (PGI). Prendì a mauns ha la PSR in vegl desiderat, numnadamain il project da barat da classas. L'idea fiss ch'ina classa sur-silvana giess per in'emna en Engiadina ed ina classa ladina sin Surselva.

Era ha la PSR elavurà – ensemen cun la Somedia sco editura da LQ – sin dumonda e proposta da *Claudia Cadruvi* – da pajar abunnaments da prova da La Quotidiana a personas rumantschas. Planisadas per quest onn èn duas fasas cun regals d'abunnaments. L'emprima da tschertga ha gi lieu a la fin da 2016, uschia che las emprimas personas han gia LQ per in mez onn. La segunda fasa suonda questa stad.

Ina midada hai igl era dà en il secretariat da la PSR. Cun la fin da l'onn passà ha *Andrina Flepp* demissionà. Ses post ha *Martin Cantieni* surpiglià ch'è era responsabel per la pagina d'internet da la PSR.